

Majlis Hi-Tea & Apresiasi Staf 2020

Oleh : Hayani Abu Yamin

12 Mac, 2020 adalah tarikh bersejarah dan disaksikan oleh The Balairong di Tasik Ayer Keroh, Melaka bila mana Majlis Hi-Tea & Apresiasi Staf 2020 telah berlangsung dengan suasana santai dan sangat meriah. Hampir kesemua staf dari pejabat Pusat Perkhidmatan Pengetahuan Dan Komunikasi (PPPK) dan Pejabat Ketua Pegawai Maklumat (Pej CIO) hadir dan meluangkan masa bersama-sama untuk meraikannya.

Majlis anjuran Kelab Kebajikan dan Sukan (K-SCOM) ini telah lama dirancang dan disusun. Beberapa siri perbincangan telah dibuat oleh kelab untuk memastikan perjalanan majlis tersusun dan lancar. Alhamdulillah, akhirnya dengan persetujuan pihak pengurusan PPPK serta sokongan daripada Penaung kelab, majlis ini telah adakan pada 12 Mac 2020 bertempat di The Balairong, Tasik Ayer Keroh

Setelah mengambil kira semua keperluan dan logistik, The Balairong dipilih sebagai lokasi penganjuran yang amat bersesuaian, bersebelahan dengan tasik yang dapat membangkitkan suasana tenang, nyaman dan tenteram.

Penganjuran majlis ini adalah sebagai tanda penghargaan kepada semua staf yang telah memberikan kerjasama, sokongan dan komitmen yang tidak berbelah bahagi kepada semua aktiviti-aktiviti anjuran kelab. Disamping itu ianya juga adalah sebagai ruang untuk mengeratkan ukhwah dan silaturrahim sesama staf.

Menariknya, majlis yang bertemakan flora ini, mendapat sokongan padu daripada semua staf dengan mengenakan busana atau fesyen mengikut tema yang ditetapkan oleh penganjur.





Majlis dimulakan seawal jam 2.00 petang, bermula dengan sesi pendaftaran staf. Setiap staf menerima goodies sebagai cenderahati. Majlis diteruskan dengan bacaan doa dan ucapan alu-aluan daripada penaung, penasihat dan pengerusi kelab.

Pelbagai acara menarik telah disusun dengan sebaiknya. Acara diselang-selikan di antara games, penyampaian hadiah dan cabutan nombor bertuah. Majlis turut dimeriahkan dengan alunan muzik oleh DJ jemputan khas.

Antara aktiviti yang dianjurkan adalah Majlis Sambutan Hari Lahir Staf, Majlis Perpisahan Staf, *games* atau permainan, penyampaian hadiah kumpulan K-SCOM, penyampaian hadiah bagi setiap aktiviti anjuran kelab, cabutan nombor bertuah serta sesi karaoke.

Turut menjadi tumpuan adalah pertandingan peragaan pakaian bagi staf lelaki dan wanita. Seramai 6 orang staf telah disenarai pendek, 3 orang bagi kategori lelaki dan 3 orang bagi kategori wanita. Yang menariknya penentuan pemenang ditentukan daripada hasil sorakan semua staf.



Majlis turut dimeriahkan dengan acara bertukar-tukar hadiah sesama staf. Untuk acara ini, setiap staf membawa hadiah masing-masing dan akan bertukar hadiah dengan staf lain yang dicabut namanya secara rawak. Aktiviti ini adalah sebagai satu simbolik dan mengukuhkan lagi ukhwah dan silaturrahim yang telah sekian lama terjalin.

Majlis berlansung sehingga hampir jam 6.00 petang. Staf mengambil peluang untuk bergambar kenang-kenangan dan sebahagiannya tidak melepaskan peluang untuk menyumbangkan suara berkaraoke. Rata-ratanya staf amat gembira dan berpuas hati dengan acara yang telah disediakan. Staf juga turut membawa pulang pelbagai hadiah cabutan bertuah yang amat lumayan termasuklah barangan elektrik dan peralatan rumah hasil sumbangan kelab.

Pihak kelab ingin merakamkan sekalung penghargaan kepada semua staf yang telah hadir dan sama-sama menjayakan majlis ini. Jutaan terima kasih kepada jawatankuasa K-SCOM sesi 2018-2020 yang telah memberikan komitmen dan kerjasama yang amat baik dalam mengurus dan memastikan perjalanan majlis lancar daripada mula hingga selesai majlis.



Pihak kelab juga ingin mengucapkan terima kasih kepada individu atau penaja-penaja yang telah memberi sumbangan dan menaja hadiah bagi cabutan nombor bertuah. Moga majlis seperti ini dapat diteruskan pada masa akan datang dan berharap hubungan mesra yang terjalin sentiasa diperkukuhkan lagi bagi meningkatkan motivasi kerja dan kelancaran operasi dalam menyampaikan perkhidmatan yang berkualiti kepada pelanggan.